



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL**

Komunikadu Imprensa

Periodu : Jullu 2011

Edisaun : 19 Jullu 2011

**JSMP realiza treinamentu ba jornalista rádiu comunidade Rejiaun I
iha Distritu Baucau**

Durante loron rua nia laran husi loron 11 - 12 fulan Jullu 2011, JSMP liu husi Unidade Peskizador Jurídiku hamutuk Unidade Relasaun Públiku realiza treinamentu ba jornalista sira husi rádiu comunidades rejiaun I ne'ebé kompostu husi Rádio Komunitade husi Distritu 4, hanesan Rádio Komunitade Ili-Wai husi Distritu Manatuto, Rádio Komunitade Bukoli no Matebian husi Distritu Baucau, Rádio Komunitade Povu Viqueque husi Distritu Viqueque, no Rádio Komunitade Vox-Populy husi Distritu Lautem . Programa treinamentu refere hala'o no konsentra iha Distritu Baucau iha salaun Edukasaun Distritu Baucau.

Iha treinamentu ne'e partisipantes sira ne'ebé mak partisipa hamutuk ema na'in 15, kompostu husi feto na'in 7 no mane na'in 8.

Matéria treinamentu ne'e ho nia tópiku "*Profesionalismu Journalista Harê Husi Aspeitu Legál*", ne'ebé kompostu ho nia sub topiku iha kapitlu sira. Kapitlu primeiru ko'alia konabá âmbito média en-gerál ne'ebé inklui: *Definisaun Média; no Funksaun Média*. Iha kapitlu Segunda ko'alia konabá Journalista ne'ebé inklui: *Definisaun Journalismu, Journalista no Funksaun Journalista*. Iha kapitlu ikus (III) ko'alia liu aspeitu legál hanesan: *Protesaun ba profesiaun ba Journalista* ne'ebé inklui Konstituisaun da RDTL artigu 41, Konvensaun Internasionál (ICCPR) artigu 19, Lei Indonézia Nú 40/99, no Kódigu Konduta Journalista. Kapitlu ne'e mós subliña konabá "*Sansaun*" ne'ebé kobre artigu balu husi Lei Indonézia Nú 40/99, artigu sira husi Kódigu Penál no Kódigu Prosesu Penál.

Diretór Ezekutivu JSMP, Luis de Oliveira Sampaio *haktuir katak treinamentu ba jornalista ne'e hanesan kontinuasaun husi treinamentu ne'ebé hala'o ona iha tinan kotuk liu ba ho objetivu atu hametin diak liu tan koñesimentu jornalista sira iha aspeitu legál nian ne'ebé defini konabá sansaun no protesiaun ba direitu jornalista sira relasiona ho sira nia knaar no papel jurnalismu nian.*

JSMP konsiente katak papel jornalista nian importante tebes iha prosesu konsensializasaun informasaun públiku, edukasaun sivika no transformasaun sosiál. JSMP mos hanoin katak durante ne'e JSMP hetan kolaborasaun no benefisiu mutuál entre JSMP no jornalista sira. Tanba ne'e, JSMP sente orgullu hodi sai equipa no servisu iha espíritu koletivu atu hari'i no promove justisa ba ema hotu.

JSMP rekoñese katak mesmu ho limitasaun oi-oin, durante ne'e jornalista sira halo ona papél importante iha aspetu hatutan lian ba públiku. Tanbá ne'e, JSMP hanoín katak importante tebes atu apoiu jornalista sira nia koñesementu atu fasilita no enkoraza sira servisu ho profesionál no sai hanesan instrumentu atu haburas demokrasia iha Timór Leste, liu husi sira nia publikasaun ne'ebé loos, imparsiál no la inklina ba grupu ka entidades balun.

Aleinde ne'e, iha parte seluk Administradór Distritu Baucau Sr. António Augusto Guterres iha ninian diskursu hateten katak, *treinamentu jornalista ne'e importante tebes tanbá papél importante jornalista nian mak atu fó informasaun ba comunidade, no halo kontrola sosiál nune'é bele garantia justisa ba ema hotu.*

Antes atu konklui ninia diskursu ba oportunidade ne'e nia hato'ó agradesimentu wa'in ba equipa JSMP ne'ebé hakarak fahe sira nia matenek no esperiénsia ruma liu husi treinamentu ba jornalista sira ne'ebé mai husi Distritu haat. Liu tan nia mós husu atu JSMP bele kontinua hala'ó atividade ne'ebé hanesan iha futuru tanbá nia rekuñese katak treinamentu ne'e importante tebes hodi ajuda jornalista nia servisu bele diak liu tan.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Email; Luis@jsmp.minihub.org

Landline; 3323883/7295795